

名相解釋

【總持】（佛學大辭典(丁福保)）

（術語）梵語陀羅尼 Dhāraṇī，譯言總持。持善不失，持惡不使起之義，以念與定慧為體。菩薩所修之念、定、慧具此功德也。

註維摩經一曰：「肇曰：總持，謂持善不失，持惡不生。無所漏忘謂之持。」

嘉祥法華疏二曰：「問：以何為持體？答：智度論云：或說念，或說定，或說慧。」

案：《法華義疏》卷第一

問：小乘法中何故不說總持？

答：小乘人畏生死苦、速欲證涅槃，不欲廣修諸行，是故不說；菩薩既遍度眾生備修諸行，欲令終身不失、歷劫逾明，故佛為說此法也。總持二義：一、持善令不失；二、持惡使不生。

問：以何為持體？

答：《智度論》云「或說念、或說定、或說慧」，今明即一正觀，隨義異名，憶持不失能照法實名為般若。故《論》云「在聲聞心名道品，在菩薩心名陀羅尼」。

案：《法華義疏》卷第十二

問：在聲聞心何故名道品？菩薩心中名陀羅尼耶？

答：論云「道品但為趣涅槃，聲聞但厭生死、樂於涅槃，故在聲聞心名道品；聲聞法中不說陀羅尼，菩薩欲遍持一切行，令經身不失歷劫逾明，故在菩薩心中名陀羅尼。」陀羅尼有無量門，今是呪陀羅尼，故舉通以取別。

問：呪是何物耶？

答：諸佛菩薩說法有二：一、顯現；二、祕密。呪即是祕密法。如世人有二種法：

一、顯現，謂世俗之常法；二、祕密術，謂禁呪等。今隨世俗亦作此二法。有人言：呪所論不出三義，一、說極果勝德，或因中萬行，故聞者發心。二、說三寶名字，或諸佛菩薩之別名，或大力鬼神之名，招呼此名使魔耶聞者驚退。三、說諸法深理無相，使聞者悟道得無生忍。

問：諸經中何故不翻呪耶？

答：呪語多含，此間無物以擬之；若欲翻之，於義不盡，又失其勢用。如此間禁呪之法，要須依呪語法而誦之則有神驗，不得作正語而說。

問：云何得陀羅尼令人不忘？

答：一、以過去修習所得；二、因呪術得；三、因服藥得，如諸仙等；四、因現在修習得；五、因禪定得；六、深入實相故得也。

【四種總持】（佛學大辭典(丁福保)）

（名數）菩薩總持之德無量，姑舉四種：

一、法總持。又名聞總持。於佛之教法聞持不忘也。

二，義總持。於諸法之義理總持不失也。
三，咒總持。菩薩依定起咒，持咒神驗，除眾生之災患也。
四，忍總持。菩薩之實智，忍持法之實相而不失也。
真言陀羅尼者此中之咒總持也。見大乘義章十一末。

【五種法師】（三藏法數(明一如等撰)）

〔出法華文句〕法者軌則也，師者匠也。法雖可軌，體不自弘，弘之在人。是故五種弘經之人，皆得稱為法師也。

〔一、受持〕，信力故，受念力故，持謂於如來言教，以堅固深信受之，於己憶持不忘，是為受持法師。

〔二、讀經〕，對文曰讀，謂正心端坐，目睹經文，口宣句讀，是為讀經法師。

〔三、誦經〕，背文曰誦，謂習讀既熟，不須對文自然成誦，是為誦經法師。

〔四、解說〕，謂聖教之義難解，若能分明解釋，訓授於人，是為解說法師。

〔五、書寫〕，謂於諸佛經典，若能書寫廣傳，流通大法，是為書寫法師。

【然燈佛】（佛學大辭典(丁福保)）

（佛名）梵名 **Dipaṅkara**，提洹竭，提和竭羅，瑞應經譯曰錠光，智度論譯曰然燈。錠為燈之足，釋迦如來因行中第二阿僧祇劫滿時逢此佛出世，買五華之蓮，以供養佛，髮布於泥，令佛蹈之，以受未來成佛之記別。

智度論九曰：「如然燈佛，生時一切身邊如燈，故名然燈太子。作佛亦名然燈，舊名錠光佛。」

四教集解中曰：「亦名然燈，亦名錠光。有足名錠，無足名燈。錠字或作定字，非也。」

瑞應經上曰：「錠光佛時，釋迦菩薩名儒童，見王家女曰瞿夷者，持七枝青蓮華，以五百金錢買五莖蓮，合彼女所寄託二枝為七莖蓮奉佛。又見地泥濘，解皮衣覆地，不足，乃解髮布地，使佛蹈之而過，佛因授記曰：是後九十一劫，名賢劫，汝當作佛，號釋迦文如來。」

心地觀經一曰：「昔為摩納仙人時，布髮供養然燈佛，以是精進因緣故，八劫超於生死海。」（摩納 **Mānava** 譯儒童）。

案：《金剛般若波羅蜜經》（姚秦藏鳩摩羅什譯）當中，有然燈佛為釋迦佛授記之文：

「須菩提！於意云何？如來於然燈佛所，有法得阿耨多羅三藐三菩提不？」

「不也，世尊！如我解佛所說義，佛於然燈佛所，無有法得阿耨多羅三藐三菩提。」

佛言：「如是，如是！須菩提！實無有法，如來得阿耨多羅三藐三菩提。須菩提！若有法如來得阿耨多羅三藐三菩提者，然燈佛則不與我授記：『汝於來世，當得作佛，號釋迦牟尼。』以實無有法，得阿耨多羅三藐三菩提，是故然燈佛與我授記，作是言：『汝於來世，當得作佛，號釋迦牟尼。』何以故？如來者，即諸法如義^{註1}。

註1：如者，(1)如法之各各之相也、(2)如法之實相也。如地之堅相，如水之濕相，謂之各各之相，是事相之如也。然此各各之事相，非實有，其實皆空，以彼此之諸法以空為實。空者，是諸佛之實相也，此實相之如，稱為如。智度論三十二曰：「諸法如有二種：一者各各相，二者實相。」（From: 佛學大辭典(丁福保) 【如】之辭條）